

PELAJAR 14

BESAUM

A. TUJU BESAUM

Besaum enggau orang Kristen ti bukai naka ia beguna amai, laban lebuah kitai besaum/ begulai bisi utai ti deka nyadi...

1. **Orang Ti Arap Dikeringka Sereta Mansang Di Dalam Kristus**

“Aku keran deka betemu enggau kita awak ka magi pemeru ari Roh Kudus enggau kita, awak ka ngering ka kita. Reti utai ti ko aku nya, kitai sama bulih tulung: kita ditulung ulih pengarap aku, lalu aku ditulung ulih pengarap kita.” (Rom 1:11,12).

2. **Awak ka Dunya Nemu Jesus Dikirimka Nyadi Seruan Allah Taala**

“Aku meri sida mulia baka ti diberi nuan ngagai aku, awak ka sida tau nyadi siko, baka nuan enggau aku ti nyadi siko. Aku dalam sida lalu nuan dalam aku, awak ka sida amat saum nyadi siko, awak ka dunya nemu nuan ngasuh aku, lalu nemu mega nuan rindu ka sida baka nuan rindu ka aku.” (John 17:22,23).

B. ATUR BESAUM

1. **Komitmen Bepangai Ba Siko Orang Enggau Siko Orang Ti Bukai**

“Rindu ka pangan diri baka diri menyadi dalam Kristus, lalu enda tau enda bebasa ka pangan diri.” (Rom 12:10).

Enti enda bepun ari bisi pengarap ngagai siko-siko orang tentu kitai enda ulih besaum. Penalam pengarap ngagai siko-siko orang enda sama tang bepangai ba penalam ni komitmen orang nya.

2. **Komitmen Kitai Patut Bepangai Ba ‘Agape’**

‘Agape’ ianya siti ari pengerindu ti penuh enggau pengasih. Komitmen ti bansa tu enda ulih digaga-gaga ulih perangai siko-siko orang.

“Pesan ti baru diberi aku ngagai kita: rindu ka pangan diri. Baka aku ti udah rindu ka kita, baka nya mega kita rindu ka pangan diri.” (John 13:34).

3. **Besaum Ti Bendar Ianya Besaum Ti Bepangai Ba Kristus**

Besaum kitai enggau orang bukai patut bepangai ba komitmen kitai ngagai Kristus.

“Nama utai ti udah dipeda enggau ti udah didinga kami ditusi kami ngagai kita, ngambi ka kita deka enggau kami besaum enggau Apai sereta enggau Anak iya Jesus Kristus.” (1 John 1:3). Peda mega ba Pilipi 2:1,2.

4. **Bejalai Ba Dalam Penampak**

Lebuah kitai idup besaum enggau orang bukai, kitai beguna ka perangai ti beterus-terang, ulih dikarap lalu ngasi sereta nangi ka pangan diri. Utai tu bereti:

a. Sama-Sama Ngaku Dosa Diri, Tauka Nutup Dosa Pangan Diri

“Enti kitai bejaku, madah ka diri besaum enggau iya, tang kitai diau dalam petang, reti nya kitai bula dalam jaku enggau pengawa. Tang enti kitai diau dalam penampak-baka iya ti dalam tampak-nya baru kitai besaum enggau diri sama diri, lalu darah Jesus Kristus, Anak iya, nuchi kitai ari semua penyalah.” (1 John 1:6,7). Peda mega ba Matthew 18:15.

b. Ngasi Ngagai Penampak Perintah-Perintah Tuhan Ti Udah Diberi Ngagai Semua Kitai Tauka Siko-Siko Kitai.

c. Ngelengka ka Semua Pemula Tauka Ati Ti Enda Amat

Chukup mayuh serakup ba dunya tu ti bula, ngaga diri enggau enda amat.

“Nya alai diatu, ulih kita ngasi ka utai ti bendar, kita udah nuchi diri lalu udah rindu ka diri ti sama arap, rindu ka pangan diri enggau pengabis ati kita.” (1 Peter 1:22).

5. Anang Inginka Pemi Orang Bukai

Anang bisi niat ti enda manah deka bulih untung ka diri empu. Peningin kitai sepatut iya meri tang ukai nerima.

“Anang ngereja utai ti bepun ari pengamu ati tauka ari peningin ti angkun ka diri empu; tang diau baruh ati enggau pangan diri, anang ngerunding diri badas agi ari orang bukai. Berunding ka utai ti dikedeka pangan diri, anang semina berunding ka diri empu aja.” (Pilipi 2:3,4).

6. Peneka Nyerah Ka Diri

“Pesan aku munyi tu: rindu ka pangan diri, baka aku ti udah rindu ka kita. Pengerindu ti pemadu besai ti ulih diberi orang ka pangan iya, iya nya meri nyawa diri ketegal sida.” (John 15:12,13).

Pengidup tu ukai semina pengidup ba tubuh aja. Tang mega nyengkaum pesaka kitai, pengerindu kitai ngereja siti-siti pengawa, peneka ati enggau utai bukai. (Jam 2:15,16). Utai tu mega peneka nyerah ka diri empu. Kitai semina ngelala orang tang pemesai ni peneka iya nyerah ka diri empu.

C. BESAUM BA GERIJA MAI RETI.

1. Bekunsi Semua Utai.

Bisi tiga tikas pemansang besaum ba dalam SPKR 4:32, keterubah iya, sida datai ari siti ati (roh), udah nya sida nyadi siti runding (pikir) lalu enggau semua reta tengkira sida saum magang nadai bechiping.

“Semua sida ti arap majak begulai enggau pangan, lalu saum utai enggau pangan diri. Sida nyual reta enggau pemisi sida, lalu magi duit rega utai nya enggau semua orang, nitih ka pemayuh ti diguna siko-siko.” (SPKR 2:44,45).

2. Nyerah Ka Pengidup Sida

“Aku bekirim tabi ngagai Prisila seduai Akuila, ti sama enggau aku ngereja pengawa ka Jesus Kristus. Sida udah nyerah ka nyawa diri ketegal aku. Aku meri terima kasih ka seduai-

ukai semina aku, tang baka nya mega semua nemiak eklisia orang bansa bukai.” (Rom 16:3,4).

3. Nyerah Ka Diri Ngagai Pengawa Nemiak Allah Taala.

“Kita nemu pasal Stepanas enggau sida sebilik; sida orang ti berubah nyadi orang Kristen di Akaia lalu udah nyerah ka diri ngagai pengawa nemiak Allah Taala.” (1 Kor 16:15).

4. Tulung ngagai orang ti seranta dikenataika Nengah Sida

“... Tang laban kita bisi utai jam ti diatu, nya alai endang patut kita nulung sida ti beguna ka tulung. Udah nya lebuah kita beguna ka tulung lalu sida bisi mayuh utai, sida deka nyaup kita. Ngena jalai nya orang digaga sama sebaka.” (2 Kor 8:14). Pedana mega ba 1 Korint 16:17.

5. Besaum Dalam Penusah

“Tang kita udah badas bendar nulung aku lebuah aku kena penusah.” (Pilipi 4:14).

6. Lempung Ati Meri

“Sida udah balat diuji ulih mayuh macham penusah ti udah diasai ka sida; tang ati sida gaga bendar, nya alai sida enda kakang meri pemerit ti mayuh agi, taja sida umang bendar. Aku berani netap ngagai kita, sida udah meri naka pemayuh ti ulih sida, tauka lebih agi ari ti ulih sida.” (2 Korint 8:2,3).

7. Selalu Mandang Ka Pemanah

“Nuan pangan ti dikerindu ka aku, nuan amat taluk dalam pengawa ti dikereja nuan ka sida ti sama Kristen, taja sida enda dikelala nuan” (3 John 5). Pedana mega ba Hebrew 13:2.

8. Sama-Sama Ngangkat Sereta Ngering Ka Diri Sama Diri

“Laban pengerindu kami ka kita, nya alai kami ukai semina deka magi Berita Manah ka kita, tang pengidup kami mega ketegal kita. Kita endang di kerindu ka kami!” (1 Tesalonika 2:8). Pedana mega ba 2 Timoti 3:10-14.

D. PENGUNTUNG ARI BESAUM

Utai ti berubah ka ulih ari besaum ba gereja ianya:

- Penangika Tuhan (SPKR 2:43);
- Pengaga (SPKR 2:46);
- Manah ati enggau orang bukai (SPKR 2:47);
- Penyampau orang ti arap semakin mayuh (SPKR 2:47);
- Semua utai dipeguna bisi magang (Pilipi 4:19); enggau
- Ngasilka tuai raban (1 Korint 16:15,16).

TANGGUNG PENGAWA AKU

Nengah pelajar tu diatu aku nemu beguna amat besaum terus menerus enggau orang Kristen ti bukai. Saritu aku nyerah ka aku empu nyadi siko ari raban orang ti arap ngagai sida, aku deka meri penaluk ati, pengerindu aku sereta mela sida.